

Uunga siunnersuut: Illunut sanaqataaffiusunut taarsigassarsiat pillugit Inatsisartut inatsisaat nr. xx, xx. xxx 2018-imeersoq

(Ineqarnermut Attaveqaqatigiinnermullu Naalakkersuisoq)

Saqqummiussineq

(Ineqarnermut Attaveqaqatigiinnermullu Naalakkersuisoq)

Siullermeerneqarnera

Matumuuna Naalakkersuisut sinnerlugit illunut sanaqataaffiusunut taarsigassarsiat pillugit Inatsisartut inatsisissaattut siunnersuut saqqummiuppara.

Inuiaqatigiinni naligiinnerup annertusinissaa, nunami immikkoortuni tamani ineriartornermik pilersitsinissaq Naalakkersuisut kissaatigaat – minnerunngitsumillu ilaqutariit ataasiakkaat pillugit toqqissimanermik tamanullu inissaqartitsisumik pilersitsinissaq. Inissianik pisariaqartitsiffiusuni inissianik sanaartornerup ilaqutariit ataasiakkaat toqqissimasumik atugaqarnissaat qulakkeerpaa, sanaartornermik ingerlataqalersitsilluni aamma inoqutigiiit sumiiffimmi inuunermik ingerlatsisinnaaneranunut pitsaasumik tunngavissiilluni. Taamaalilluni siunnersuutigineqarpoq illumik sanaqataanermik aaqqissuussineq suli annerusumik nunaqarfinnut illoqarfinnullu mikinerusunut sammitinneqassasoq. Siunnersuutigineqarpoq siunissami taamaallaat nunaqarfinni kiisalu Kangaatsiami, Qaanaami aamma Ittoqqortoormiini illumik sanaqataaffiusunik nutaanik sanaartornissamut taarsigassarsisitsisoqarsinnaassasoq.

Inoqutigiiit nammineq inissiamik pilersornissamut piumassuseqaraluarpataluunniit, nunaqarfinni illoqarfinnilu mikisuni illuliornissamut aningaasalersuutissarsiniarneq ajornakusoorsinnaavoq, pingaartumik ilaqutariit isertitakitsuuppata. Illumik sanaqataaffiusussamik aaqqissuussineq nunaqarfinni illoqarfinnilu mikinerusuni innuttaasunut illumik sanaqataaffiusussamut ileqqaarnissamut imaluunniit taarsigassarsinissamut periarfissaqartunut, kisiannili aningaaserivikkut taarsigassarsinikkut imaluunniit illuummik qularnaveeqqusiilluni taarsigassarsisitsisarfikkut aningaasalersuinerup sinneranut pissarsisinnaangitsunut saaffiginnippoq.

Ukiuni kingullerni qinnuteqartut piukkunnaateqartut ikitsuararsuusimapput. Taamaattumik arlalitsigut oqilisaasoqarnera ilanngunneqarpoq, taamaalilluni innuttaasut amerlanerusut illumik sanaqataanissamut qinnuteqarsinnaallutik. Peqqussummi atuuttumi inoqutigiiit akileraaruserneqartussanik agguaqatigiissillugit 450.000 kr.-it sinnerlugit ukiumut isertitaqarpata illumik illulioqataaffiusumut taarsigassarsisitsisoqarsinnaangilaq. Siunnersuutigineqarpoq killiliussaq taanna 600.000 kr.-inut qaffanneqarlunilu aalajangersarneqassasoq. Taamaalilluni inuit amerlanerusut nammineq akiliutissaminut ileqqaarsinnaassasut nalilerneqarpoq.

Naalakkersuisut maluginiarpaat sanaqateqarluni illuliortup illu pigisani taamaatissimanngippagu, najugaqartussaataitaneq nuttarsinnaanermut periarfissanik annikilliliisinaasoq. Illup sanaqataaffiusup siunertaq naapertorlugu atorneqarnissaa

pingaaruteqaraluartoq, najugaqartussaataanerup sakkukillineqarnissaa, aammalu pisortat inissiaataannik attartortittakkamik allamut attartortitsisarnermut maleruagassat assigalugit illumik piginnittup inissiamik ukioq ataaseq tikillugu peqquteqarani immikkullu ittumik pisoqarsimatillugu piffissami sivisunerusumi attartortitsisinnaanissaa siunnersuutigineqarpoq.

Aaqqissuussaaneermik iluarsaaqqinnerup naammassineqarnerata kingorna suliassanik kommuninut suliassanngortitsinermi Naalakkersuisut pingaarnersiunerinut atasumik "Nunaqarfinnut isorliunerusunullu inissialiornermi suliassanit aningaasaliissutit" aningaasartai ilanngullugit 1. januar 2017-imit sunniuteqartumik kommuninut ataasiakkaanut tunniunneqarput.

Ineqarnermik aaqqissuusseqqinneq inuunermi atugassarititaasut pitsaanerulernissaannut minnerunngitsumillu aningaasaqarnerup uummaarinnerusumik ineriartornissaanut qulakkeereqataassaaq. Aaqqissuusseqqinnermi naligiinnerup annertunerulernissaa aammalu isertitakitsut akunnattumillu isertitallit inissianik pilersorneqarnerisa pitsaanerulernissaa Naalakkersuisut pingaartippaat.

Taamatut oqaaseqarlunga Naalakkersuisut sinnerlugit immikkoortoq Inatsisartuni suliassanngorlugu tunniuppara.